

Na osnovu Poglavlja IV Odjeljak A člana 23. Ustava Bosansko – podrinjskog kantona Goražde („Službene novine Bosansko-podrinjskog kantona Goražde“, broj: 8/98,10/00 i 5/03) i člana 106. i 108. Poslovnika Skupštine Bosansko-podrinjskog kantona Goražde („Službene novine Bosansko – podrinjskog kantona Goražde“ broj: 10/08), Skupština Bosansko – podrinjskog kantona Goražde, na svojoj ____-toj redovnoj sjednici, održanoj dana _____2013.godine, **donosi**

**ZAKON O KONCESIJAMA
BOSANSKO-PODRINJSKOG KANTONA GORAŽDE**

**DIO PRVI
OPĆE ODREDBE**

Član 1.
(Predmet Zakona)

Ovim Zakonom uređuju se opći uslovi za dodjelu prava korištenja prirodnih bogastava, dobara u općoj upotrebi i obavljanje djelatnosti od općeg interesa na području Bosansko-podrinjskog kantona Goražde putem koncesija, način i uslovi pod kojima se mogu dodjeljivati i koristiti koncesije, organi Bosansko-podrinjskog kantona Goražde (u daljem tekstu: kanton) nadležni za sprovođenje postupka za dodjelu koncesije, postupak za dodjelu koncesije, ugovor o koncesiji, nadzor nad sprovođenjem ovog Zakona, izvještavanje i druga pitanja od značaja za dodjelu i korištenje koncesija.

Član 2.
(Definicije)

U smislu ovog zakona, termini koji se u njemu koriste imaju slijedeće značenje:

1. *Javni interes* u smislu odredbi ovog Zakona predstavlja aktivnost koja dodjelom koncesije doprinosi povećanju zapošljavanja, ekonomskom razvoju, poboljšanju usluga od općeg ekonomskog interesa, optimalnom korištenju prirodnih resursa i dobrobiti cjelokupnog stanovništva Bosansko-podrinjskog kantona Goražde.
2. *Javno-privatno partnerstvo* su aktivnosti i djelatnosti koje se provode u skladu sa Zakonom o javno-privatnom partnerstvu Bosansko-podrinjskog kantona Goražde (Službene novine broj 5/13).
3. *Nadležni organ* je organ uprave ili jedinice lokalne samouprave u čijoj nadležnosti je dodjela predmetne koncesije.
4. *Odluka o dodjeli koncesije* je upravni akt koji donosi koncesor na prijedlog Komisije za koncesije (u daljem tekstu: Komisija) nakon ocjene pristiglih ponuda za davanje koncesije, a u skladu s dokumentacijom za nadmetanje i kriterijima za izbor najpovoljnije ponude.
5. *Ponuđač* je pravno ili fizičko lice koje je dostavilo ponudu u postupku za dodjelu koncesije.

6. *Prirodno bogastvo* je dobro koje se nalazi na površini i unutar zemljišnog, vodnog i zračnog dobra na području kantona koje se može iskorištavati u privredne svrhe.
7. *Privredni subjekt* je fizička ili pravna osoba ili zajednica tih osoba koja na tržištu nudi izvođenje radova i/ili poslova, isporuku robe ili pružanje usluga.
8. *Privredno društvo* je pravno lice koje samostalno obavlja djelatnost proizvodnje i prodaje proizvoda i vršenje usluga na tržištu radi sticanja dobiti u skladu sa Zakonom o privrednim društvima
9. *Privredna djelatnost* djelatnost fizičkih ili pravnih osoba ili zajednica tih osoba koja ostvaruju dohodak na tržištu nudi izvođenje radova i/ili poslova, isporuku robe ili pružanje usluga.
10. *Registar koncesija* je jedinstvena elektronska evidencija ugovora o koncesijama datih na području Kantona.
11. *Ugovor o koncesiji* je ugovor koji zaključuju koncesor s jedne strane i koncesionar s druge strane, a koji sadrži odredbe o međusobnim pravima i obavezama vezanim za korištenje date koncesije.
12. *Usluge od općeg ekonomskog značaja* su aktivnosti koje su identifikovane od strane nadležnih državnih organa kao usluge od posebne važnosti za građane koje ne bi bile dostupne građanima ili bi im bile dostupne pod uslovima koji su manje povoljni od uobičajenih ukoliko bi izostala intervencija javnih organa, pod slijedećim kumulativnim uslovima:
 - a. pružaocu usluga su efektivno povjerene nadležnosti koje uključuju jasno definirane obaveze po pitanju pružanja usluga ili izvođenje radova,
 - b. parametri za obračunavanje naknada su unaprijed utvrđene na objektivan i transparentan način,
 - c. naknade koje se naplaćuju pružanjem usluga nisu veće od iznosa koji je neophodan za pokrivanje svih ili dijela troškova nastalih ispunjavanjem obaveza po osnovu pružanja javnih usluga, uzimajući u obzir da je pružaocu usluga omogućeno da ostvari razumnu zaradu za ispunjavanju obaveza.
 - d. pružaoac usluga se bira na na jasan i transparentan način koji omogućava izbor najefikasnijeg modela pružanja usluga propisanog standarda kvalitete.

Član 3.

(Definisanje koncesije)

(1) Koncesija je pravo korištenja prirodnog bogastva, dobra u općoj upotrebi ili obavljanja djelatnosti od općeg interesa koje pravnom ili fizičkom licu nadležni kantonalni organ daje da koristi na određeno vrijeme, uz plaćanje koncesione naknade na način i pod uslovima propisanim ovim Zakonom.

(2) Davalac koncesije (koncesor) u smislu ovog Zakona je Vlada Bosansko-podrinjskog kantona Goražde (u daljem tekstu: Vlada) koja u ime Kantona putem nadležnih organa odlučuje o dodjeli koncesije.

(3) Korisnik koncesija (koncesionar) je pravno ili fizičko domaće ili strano lice koji obavlja privrednu djelatnost na području Kantona učestvujući na tržištu putem proizvodnje ili trgovine roba i/ili usluga korištenjem prirodnih bogastava, dobara u općoj upotrebi ili drugu djelatnost od općeg interesa na osnovu zaključenog ugovora o koncesiji.

Član 4.

(Primjena zakona)

(1) Zakon se primjenjuje na sva pravna i fizička lica koja obavljaju privrednu djelatnost za koju je ovim zakonom određeno da se obavlja na osnovu zaključenog ugovora o koncesiji.

(2) Ovaj Zakon se ne primjenjuje na pravna i fizička lica određena u članu 7. ovog Zakona.

Član 5.

(Ciljevi i politke u oblasti koncesija)

(1) Ciljevi kantona u oblasti koncesija su:

- a. podsticanje efikasnog korištenja prirodnih bogastava i dobara u općoj upotrebi u cilju ekonomskog, socijalnog, kulturnog razvoja kantona uz istovremenu zaštitu od korištenja koje ne doprinosi optimalnoj dobrobiti svih stanovnika Kantona,
- b. osiguranje usluga od općeg ekonomskog značaja koje su od posebne važnosti za građane i koje im ne bi bile dostupne ukoliko bi izostala intervencija Vlade,
- c. podsticanje konkurentnosti i održivosti privrede na području Kantona,
- d. stimulisanje ulaganja investicijskog, domaćeg i stranog kapitala u razvoj privrede i stvaranje novih i konkurentnih radnih mjesta,
- e. optimalno korištenje prirodnih resursa, posebno u području vodnog i zemljišnog dobra te osiguranje balansa između zahtjeva za ekonomskim razvojem i zahtjeva za zaštitom, očuvanjem i unaprijeđenjem okoliša i prirode,
- f. poboljšanje kvalitete pružanja javnih usluga na području Kantona, posebno u oblastima u kojima je kvalitet pružanja javnih usluga nizak ili koji se mogu značajno unaprijediti ukoliko bi se njihovo pružanje osiguralo putem koncesija,
- g. omogućavanje efikasnog, transparentnog, nediskriminatornog i jasanog pravnog okvira za utvrđivanje uslova pod kojima se pravnim ili fizičkim licima mogu dodjeljivati koncesije na području Kantona.

(2) Politika u oblasti koncesija zasniva se na slijedećim principima:

- a. na području kantona zabranjeno je korištenje prirodnih bogastava ili dobara u općoj upotrebi bez zaključenog ugovora o koncesiji i suprotno ovom Zakonu,
- b. koncesionari su dužni platiti ekonomsku cijenu za korištenje koncesionih prava u srazmjeri sa procjenjenom vrijednošću koncesije,
- c. u procesu upravljanja koncesijama vodi se posebna pažnja o zaštiti i očuvanju okoliša,
- d. koncesije za korištenje prirodnih bogastava neće se odobriti ukoliko postoji opasnost od većeg narušavanja prirodnog stanja okoliša na području kantona.

Član 6.

(Načela)

- (1) Uređivanje uslova, načina i postupka dodjele koncesije zasniva se na načelima jednakog i pravičnog tretmana, slobodne tržišne utakmice i autonomije volje ugovornih strana.
- (2) Načelo jednakog i pravičnog tretmana obuhvata zabranu diskriminacije po bilo kom osnovu između učesnika u postupku davanja koncesije i izbora koncesionara, kao obavezu da učesnici u postupku izbora koncesionara imaju potpune i tačne informacije o postupku, standardima i kriterijima za izbor koncesionara.
- (3) Načelo slobodne tržišne utakmice obuhvata zabranu ograničavanja konkurencije između učesnika i obavezu prihvatanja svih učesnika čije ponude zadovoljavaju uslove propisane zakonom.
- (4) Načelo autonomije volje obuhvata slobodu ugovornih strana da u skladu sa zakonom i drugim propisima i dobrim poslovnim običajima, međusobna prava i obaveze urede po svojoj volji.

Član 7.

(Izuzete koncesije)

- (1) Ovaj se Zakon ne primjenjuje na:
 - a. usluge koje su proglašene od općeg ekonomskog značaja i koje se osiguravaju od strane kantonalnih i općinskih ustanova u skladu sa zakonom,
 - b. javne usluge koje pružaju općine i mjesne zajednice u skladu sa zakonom,
 - c. javna preduzeća i kantonalnu ustanovu za ceste za djelatnosti propisane Zakonom o cestama F BiH,
 - d. javna preduzeća u obavljanju djelatnosti ekonomskog iskorištavanja šuma u skladu sa kantonalnim zakonom,
 - e. korištenje dobara opće upotrebe od strane fizičkih lica bez ostvarivanja dohodka u skladu sa Zakonom o porezu na dohodak,
 - f. privredna društva koja kao svoju djelatnost obavljaju sve poslove, osim onih koje se po ovom Zakonu ne mogu obavljati kao privredna djelatnost bez zaključenog ugovora o koncesiji,
 - g. usluge i radove koje pružaju udruženja u skladu sa zakonom.
- (2) Pod korištenjem građevinskog zemljišta ili poljoprivrednog zemljišta, kao predmeta koncesije, u smislu ovog Zakona, ne smatra se korištenje građevinskog zemljišta, odnosno poljoprivrednog zemljišta, od strane pravnih i fizičkih lica po aktu nadležnog organa.

Član 8.

(Predmet koncesije)

- (1) Privredna društva na području Kantona ne mogu obavljati djelatnosti koje su predmet koncesije bez zaključenog ugovora o koncesiji.
- (2) Djelatnosti koje su predmet koncesije po odredbama ovog Zakona su:

- a. izgradnja i/ili korištenje javnih cesta, cestovnih objekata (javne podzemne i/ili nadzemne garaže, parkirališta, odmorišta) i zemljišta u cestovnom pojasu i druge djelatnosti unutar cestovnog pojasa;
- b. izgradnja i/ili korištenje objekata u oblasti energetike i energetske medija (hidroenergetski objekti, termoelektrane, termoenergetski objekti, vjetroenergetski objekti, cjevovodi);
- c. izgradnja i/ili korištenje vodoprivrednih objekata (hidroakumulacije, korištenje vodotoka i drugih voda) i drugih objekata unutar vodnog zemljišta;
- d. korištenje vodnog zemljišta u turističke, sportske i rekreativne svrhe;
- e. korištenje ljekovitih, termalnih, mineralnih i termomineralnih voda;
- f. hidromelioracioni sistemi;
- g. korištenje materijala iz vodotoka i vodnih površina;
- h. korištenje vode, vodnog zemljišta i vodnih objekata za obavljanje privredne djelatnosti;
- i. djelatnost javnog prevoza putnika, radnika, učenika i socijalnih kategorija stanovništva na području kantona,
- j. izgradnja i/ili korištenje žičare u privredne, sportske i turističke svrhe;
- k. korištenje poljoprivrednog zemljišta u vlasništvu države;
- l. istraživanje i/ili korištenje nemetalnih mineralnih sirovina uključujući sekundarne mineralne sirovine propisane posebnim zakonom;
- m. sve vrste energetske i drugih mineralnih sirovina;
- n. djelatnosti prikupljanja, prerade, odlaganja i trgovine opasnim otpadom;
- o. gospodarenje lovištima i ribolovnim područjima za privredni lov i ribolov;
- p. djelatnosti unutar zaštićenih područja prirode, te za korištenje drugih zaštićenih prirodnih vrijednosti i speleoloških objekata;
- q. izgradnja i/ili korištenje javnih kino dvorana i pozorišta;
- r. zdravstvene usluge u skladu sa kantonalnim propisom;
- s. starački domovi;
- t. izgradnja i/ili ustupanje sportsko rekreativnih objekata za koje je utvrđen javni interes;
- u. vršenja usluga od općeg ekonomskog interesa;
- v. druge djelatnosti propisane ovim Zakonom.

Član 9.

(Obavljanje komunalnih i drugih javnih službi)

Predmet koncesije su i pravo obavljanja djelatnosti komunalnih i drugih javnih službi u naseljenim mjestima, izuzev ako to nije propisano posebnim zakonom, i to:

- a. sakupljanje, prečišćavanje i distribucija vode korisnicima priključenim na komunalnu vodovodnu mrežu,
- b. sakupljanje, obrada i prečišćavanje otpadnih voda iz domaćinstava i drugih korisnika komunalne kanalizacione mreže,
- c. snabdijevanje parom i toplom vodom korisnika priključenih na komunalne objekte za proizvodnju i distribuciju pare i tople vode,
- d. distribucija gasovitih goriva potrošačima priključenim na komunalne cjevovode za ta goriva,
- e. odlaganje čvrstog otpada;

- f. sakupljanje smeća, raznih otpadaka i ostataka iz domaćinstava i pravnih lica, odvoz na sanitarnu deponiju, uključujući uklanjanje otpadaka spaljivanjem, odnosno zakopavanje i zaoravanje otpadaka, kao i reciklaža metalnih ostataka, nemetalnih ostataka i otpadaka,
- g. vršenje pogrebnih i pratećih djelatnosti, uključujući izgradnju i/ili dogradnju i održavanje javnih grobalja, izuzev religijskih pogrebnih usluga,
- h. vršenje dimnjačarskih usluga
- i. izgradnja/dogradnja i korištenje ili korištenje objekata komunalne infrastrukture (komunalnih vodovoda, komunalne kanalizacije, komunalnih cjevovoda za gasovita goriva, sanitarnih deponija).

Član 10.

(Mali obim korištenja koncesije)

- (1) Pod malim obimom korištenja koncesije, u smislu ovog zakona, smatra se:
 - a. izgradnja i/ili korištenje javnih parking prostora do 20 parking mjesta,
 - b. izgradnja / dogradnja i/ili korištenje od strane grupe građana objekata snabdijevanja vodom u seoskim naseljima putem grupnih ili mjesnih vodovoda (od 50 do 500 korisnika) ili seoskih vodovoda (do 500 korisnika);
 - c. organizacije i vršenje sportskog ribolova od strane udruženja građana za sportski ribolov;
 - d. organizacija i vršenje sportskog lova od strane udruženja građana za sportski lov.
- (2) Dodjela koncesije iz stava (1) ovog člana vrši se na osnovu neposrednog zahtjeva korisnika a bez sprovođenja postupka dodjele koncesije na osnovu javnog konkursa.
- (3) Dodjelu koncesija u smislu stava (1) i (2) ovog člana vrši Vlada kantona.

Član 11.

(Dodjela koncesije putem javnog konkursa)

Dodjela koncesija po ovom zakonu vrši se na osnovu javnog konkursa, izuzev koncesija iz člana 10. ovog Zakona.

Član 12.

(Samoinicijativna ponuda)

- (1) U slučaju da ponuđač nadležnom organu podnese prijedlog za koncesiju za koju nije raspisan javni konkurs, nadležni organ u slučaju da postoji javni interes za tu koncesiju prijedlog dostavlja komisiji za koncesiju.
- (2) Pri procjeni prijedloga iz stava (1) ovog člana Komisija za koncesiju uzima u obzir:
 - a. usklađenost sa srednjeročnim i godišnjim planom davanja koncesija iz člana 14. stav (1) ovog Zakona,
 - b. prihvatljivost samoinicijativne ponude u smislu da li je predloženi koncesioni projekat u općem interesu i u skladu sa ovim Zakonom,
 - c. hitnost pružanja usluga ili postojanja infrastrukture za javnu upotrebu.

(3) Vlada Bosansko-podrinjskog kantona Goražde na prijedlog Komisije za koncesiju donosi odluku o utvrđivanju javnog interesa za koncesiju, na osnovu kojeg Komisija za koncesije raspisuje javni konkurs za dodjelu koncesije iz stava (1) ovog člana.

Član 13.

(Naknada za koncesiju)

(1) Naknada za koncesiju je naknada koju plaća koncesionar na osnovu ugovora o koncesiji i čini obavezni i sastavni elemenat ugovora o koncesiji.

(2) Koncesiona naknada mora biti novčanog karaktera, i obavezno se sastoji od:

- a. naknade za pravo korištenja predmeta koncesije,
- b. godišnje naknade za korištenje koncesije, koja se izražava u procentima i novčanom iznosu,
- c. naknade u slučaju kršenja odredbi ugovora o koncesiji.

(3) Naknada za pravo korištenja predmeta koncesije obračunava se jednokratno i u novčanom iznosu koji ne može biti manji od 1,5 % od ukupne procjenjene vrijednosti koncesije iz člana 18. ovog Zakona.

(4) Godišnja naknada za korištenje koncesije obračunava se na godišnjem nivou i obračunava se u odnosu na godišnji bruto prihod nastao korištenjem javnih dobara, prirodnih bogatstava ili pružanja usluga ili po jedinici mjere – tona, m³, m² i litar, ukoliko ovim Zakonom nije drugačije određeno.

(5) Naknada za koncesiju iz stava (4) ovog člana može biti ugovorena kao stalan jednak iznos i/ili kao varijabilni iznos, zavisno o posebnostima pojedine vrste koncesije.

(6) Visina godišnje naknade za koncesiju određuje se zavisno o vrsti djelatnosti, roku trajanja koncesije, poslovnom riziku i očekivanoj dobiti, opremljenosti i površini općeg odnosno javnog dobra.

(7) Minimalni iznos godišnje naknade iz stava (6) ovog člana ne može biti manji 10 % od prihoda iz stava (4) ovog člana.

(8) Blize uslove za određivanje minimalne naknade iz stava (7) ovog člana propisuje Vlada kantona svojom Odlukom.

(9) Odlukom Vlade kantona vrijednost minimalnog iznosa naknade iz stava (7) ovog člana može biti umanjena ukoliko postoje specifični uslovi za eksploataciju datih koncesionih prava.

(10) U slučaju da se postupak dodjele koncesije vrši na načelima javno-privatnog partnerstva koncesiona naknada za cijeli period trajanja koncesije može se smatrati kao učešće javnog partnera u finansiranju projekta javno-privatnog partnerstva, u kojem slučaju će se koncesiona naknada računati kao učešće javnog partnera.

(11) Ugovorom o koncesiji može se odrediti promjena visine naknade za koncesiju u određenom vremenskom razdoblju za vrijeme trajanja ugovora o koncesiji, što se naznačava u dokumentaciji za nadmetanje.

(12) Za vrijeme trajanja ugovora o koncesiji koncesor ne može propisivati niti ugovarati s koncesionarom bilo koji oblik kompenzacije u zamjenu za plaćanje naknade za koncesiju.

(13) Način utvrđivanja visine koncesionih naknada, obračun i kriteriji za utvrđivanje vršiče se u skladu sa aktom koji donosi Vlada kantona u skladu sa ovim Zakonom.

(14) Ugovor bez utvrđene obaveze plaćanja koncesione naknade je ništav.

DIO DRUGI

PLANIRANJE I PRIPREMNE RADNJE ZA DODJELU KONCESIJA

Član 14.

(Srednjoročni plan)

(1) Vlada kantona uz saglasnost Skupštine kantona donosi srednjoročni (trogodišnji) plan dodjele koncesije na način utvrđen ovim Zakonom.

(2) Ministarstvo za privredu predlaže plan iz stava (1) ovog člana koji se izrađuju u skladu sa ekonomskom politikom kantona i strategijama, prioritetima i programima Vlade kantona i jedinica lokalne samouprave.

(3) Koncesije iz člana 9. ovog Zakona uvrštavaju se u srednjoročni plan na osnovu prijedloga općinskog načelnika i čine sastavni dio prijedloga iz stava (2) ovog člana.

(4) U srednjoročnom planu dodjele koncesije minimalno se navodi:

- a. sažetak ekonomske politike i planova razvoja kantona,
- b. analiza stanja u oblasti u kojima se planiraju dodjeliti koncesije,
- c. privredne i druge oblasti iz resora nadležnog ministarstva u kojima se planiraju dodjeliti koncesije za korištenje općeg ili drugog dobra, koncesije za javne radove i koncesije za javne usluge,
- d. ciljevi i rezultati koji se planiraju postići u oblastima koja je predmet koncesije,
- e. procjenjena vrijednost koncesija i planirani javni prihodi i rashodi od planiranih koncesija,
- f. ocjena očekivanih ekonomskih i društvenih koristi i očekivanih direktnih, indirektnih i nemjerljivih efekata na ekonomski, socijalni i kulturni razvoj kantona.
- g. pregled planske, projektne i investicione dokumentacije neophodne za iskorištavanje koncesije,
- h. analiza uticaja na okoliš i prirodu.

(5) Srednjoročni plan može sadržavati i druge elemente koji su od značaja za efikasnost provedbe koncesije.

Član 15.
(Godišnji plan)

(1) Svi organi čiji su prijedlozi za dodjelu koncesija uvršteni u srednjoročni plan iz člana 14. ovog Zakona dužni su prije isteka tekuće godine izraditi godišnji plan davanja koncesija iz svoje nadležnosti za narednu kalendarsku godinu, kao sastavni dio njihovog godišnjeg programa rada i programa rada Vlade kantona.

(2) Godišnji plan dodjele koncesije sadrži:

- a. sažetak i pregled planiranih koncesija u trogodišnjem periodu,
- b. procjenjena vrijednost planiranih koncesija i njihovog uticaja na stanje u oblasti predmeta koncesija,
- c. stanje planske, projektne i investicijske dokumentacije za koncesije koje se odobravaju,
- d. pregled planiranih koncesija za narednu godinu sa slijedećim minimalnim podacima:
 1. vrsta koncesije,
 2. opis koncesije,
 3. rokovi dodjele koncesije,
 4. ciljevi dodjele koncesije,
 5. uslove koje koncesionari moraju ispunjavati u skladu sa ovim Zakonom i drugim zakonima,
 6. postupak koji se provodi za izbor koncesionara,
 7. dokumentacija neophodna za dobijanje dozvole za početak iskorištavanja prava po osnovu koncesije,
- e. procijenjenu godišnju naknadu za pojedinu koncesiju i druge javne prihode po osnovu korištenja koncesija,
- f. pregled fiskalnih i parafiskalnih efekata planiranih koncesija u kratkoročnom, srednjoročnom i dugoročnom periodu.

(3) Vlada Kantona usvaja godišnji plan dodjele koncesija, nakon čega utvrđuje listu projekata koji se u narednoj godini planiraju realizirati putem dodjele koncesija, koja se objavljuje u Službenim novinama i na službenoj internet stranici kantona.

Član 16.
(Pripremne radnje)

(1) Pripremne radnje za dodjelu koncesije su sve aktivnosti koje je obavezno provesti radi dodjele koncesije a koje predhode početku postupka dodjele koncesije.

(2) Pripremne radnje za dodjelu koncesije provodi nadležni organ u skladu sa ovim Zakonom, drugim zakonima kantona te ostalim propisima u zavisnosti o vrsti i predmetu koncesija u skladu sa trogodišnjim planom davanja koncesija.

(3) Pripremnim radnjama smatraju se posebno:

- a. izrada studije opravdanosti dodjele koncesije,
- b. procjena vrijednosti koncesije,
- c. izrada planske, projektne i investicijske dokumentacije,

- d. izrada dokumentacije za nadmetanje, te
- e. poduzimanje svih ostalih mjera koje prethode postupku dodjele koncesije u skladu s odredbama ovog Zakona, posebnih propisa kojima se pobliže uređuje pojedina vrsta koncesije i odluka Vlade kantona u skladu sa utvrđenim prioritetima.

Član 17.

(Studija opravdanosti dodjele koncesije)

- (1) Studiju opravdanosti dodjele koncesije izrađuje nadležni organ.
- (2) Nadležni organ u izradi studije ili elaborata opravdanosti dodjele koncesije posebno uzima u obzir:
 - a. javni interes kantona i jedinica lokalne samouprave u sastavu kantona,
 - b. potrebne investicije i njihovu ekonomsku i/ili društvenu opravdanost,
 - c. finansijske učinke koncesije na kantonalni budžet odnosno budžet jedinica lokalne samouprave,
 - d. kratkoročni i dugoročni uticaj na zapošljavanje na prostoru kantona,
 - e. usklađenost sa privrednim razvojnim planovima i planovima koncesora u oblasti koncesija,
 - f. uticaj na okoliš, zaštitu prirode i kulturnih dobara.
- (3) Studiju ili elaborat opravdanosti dodjele koncesije izrađuje nadležni organ ili ovlašteno pravno lice registrovano za obavljanje predmetne djelatnosti, a sadržaj studije opravdanosti sastoji se minimalno od:
 - a. uvodnog obrazloženja,
 - b. operativnog sažetka,
 - c. općeg dijela sa ekonomskom, tehničkom, finansijskom i pravnom analizom,
 - d. opisa tehničko-tehnoloških uslova eksploatacije koncesije,
 - e. analize uticaja na okoliš i prirodu,
 - f. analize društvenog, kulturnog i zdravstvenog uticaja,
 - g. zaključka studije,
 - h. preporuke studije,
 - i. pripadajućih priloga.

Član 18.

(Procjena vrijednosti koncesije)

- (1) Nadležni organ računa proijenjenu vrijednost koncesije kao ukupnu vrijednost predmeta koncesije, izraženu u konvertibilnim markama (KM), koja se računa kao procjenjeni prihod koji se planira ostvariti za cijelo vrijeme trajanje koncesije bez uračunatog poreza na dodatnu vrijednost, umanjenu za procjenjeni iznos ukupne naknade za koncesiju, te diskontiran na neto sadašnju vrijednost po diskontnoj stopi koju odredi Vlada kantona, a koja odražava trenutne tržišne procjene vremenske vrijednosti novca i rizike koji su karakteristični za ulaganja srodna predmetu koncesije.
- (2) Na procjenu vrijednosti koncesije za privredno korištenje općeg ili drugog dobra osnovni elementi na osnovu kojih se utvrđuje njena vrijednost su: vrijeme korištenja koncesije, eksploatacija

površine prirodnog bogatstva, te količina iskorištenosti koncesionog prava, uz koje se primjenjuju odgovarajuće odredbe propisa kojima se uređuje pojedina vrsta koncesije.

(3) Procijenjena vrijednost koncesije računa se na osnovu podataka iz studije opravdanosti dodjele koncesije, odnosno analize dodjele koncesije.

Član 19.

(Izrada planske, projektne i investicijske dokumentacije)

(1) U slučaju da je za potrebe iskorištavanja koncesije planirana izgradnja objekata za rad postrojenja ili smještaj opreme, davalac koncesije priprema potrebnu plansku i projektnu dokumentaciju koja je neophodna za dobijanje urbanističke saglasnosti u skladu sa Zakonom.

(2) Nadležni organ može izradu dokumentacije iz stava (1) ovog člana svojim aktom prenijeti na koncesora.

Član 20.

(Tenderska dokumentacija)

(1) Nadležni organ izrađuje dokumentaciju za nadmetanje.

(2) U postupku davanja koncesije svakom se ponuđaču daje mogućnost da pod jednakim uvjetima preuzme dokumentaciju za nadmetanje.

(3) Nadležni organ dužan je unaprijed odrediti moguću novčanu naknadu za preuzimanje dokumentacije za nadmetanje.

(4) Naknada iz stavka (3) ovoga članka prihod je nadležnog organa.

(5) Podaci o ponuđačima koji su preuzeli dokumentaciju za nadmetanje i moguću dodatnu dokumentaciju moraju se evidentirati i čuvati kao tajni do otvaranja ponuda.

(6) Ako su za vrijeme roka za dostavu ponuda potrebne dopune, izmjene ili ispravci dokumentacije za nadmetanje, ona se dopunjava, mijenja ili ispravlja, a rok za dostavu ponuda po potrebi se odgovarajuće produljuje.

Član 21.

(Sadržaj dokumentacije za nadmetanje)

(1) Dokumentacija za nadmetanje sadrži sve potrebne podatke koji ponuđaču omogućavaju izradu zahtjeva za sudjelovanje u nadmetanju.

(2) Dokumentacija za nadmetanje sadrži:

- a. opće podatke (naziv i sjedište davatelja koncesije, ID broj, broj telefona, broj telefaksa, internetska adresa, adresa elektronske pošte, osoba ili služba zadužena za kontakt, procijenjena vrijednost koncesije, vrsta koncesije),

- b. podatke o predmetu koncesije (opis predmeta koncesije, tehničke specifikacije, izvođenja radova ili pružanja usluga, uslovi podugovaranja, rok početka radova ili pružanja usluga, ako je moguće, rok završetka radova ili pružanja usluga, odnosno predviđeno trajanje ugovora o koncesiji),
- c. razloge za isključenje ponude, uvjete pravne i poslovne, financijske, tehničke i stručne sposobnosti, te dokaze i podatke kojima ponuđač dokazuje ispunjenje tih uslova,
- d. uslove za učešće ponuđača u postupku dodjele koncesije koji su propisani Zakonom o javnim nabavkama BiH a odnosi se na uslove i dokaze o podobnosti ponuđača ukoliko je to primjenjivo,
- e. podatke o zahtjevu za učešće u nadmetanju (sadržaj i način izrade, način dostave, način određivanja cijene, odnosno naknade za koncesiju, valuta ponude, kriterij za odabir ponude, rok valjanosti ponude),
- f. ostale podatke (odredbe koje se odnose na konzorcijum, odredbe koje se odnose na podizvođača, datum, vrijeme i mjesto dostave zahtjeva za učešće i javnog otvaranja ponuda, rok za donošenje odluke o davanju koncesije, rok, način i uslovi plaćanja naknade za koncesiju, uslovi i zahtjevi koji moraju biti ispunjeni u skladu s posebnim propisima ili stručnim pravilima, pravo korištenja nekretnine, odnosno pravo služnosti i naknada za nekretninu, naziv i adresa žalbenog tijela, te podatak o roku za izjavljivanje prigovora na provođenje postupka dodjele dokumentaciju za nadmetanje, drugi podaci koje davatelj koncesije smatra potrebnima),
- g. vrstu, sredstvo, uslovi i rok za dostavu instrumenata osiguranja, ako su tražena, a koji su prilagođeni opsegu i vrijednosti ugovora o koncesiji i predmeta koncesije te čija je naplata izvjesna,
- h. nacrt ugovora o koncesiji,
- i. navod mogućih izmjena i opcija ugovora o koncesiji.

(3) Ako nadležni organ na temelju posebnog propisa ima pravo određivanja cijene koju koncesionaru za njegove usluge plaćaju krajnji korisnici ili davanja suglasnosti koncesionaru na cjenik njegovih javnih usluga, takvo pravo, kao dio budućeg ugovora o koncesiji, treba biti sastavni dio dokumentacije za nadmetanje.

(4) Ako je odabrani najpovoljniji ponuđač obavezan osnovati društvo posebne namjene u svrhu provedbe ugovora o koncesiji, u dokumentaciji za nadmetanje navode se jasno određenje oblika privrednog društva, minimalnog osnovnog kapitala, obaveze odabranog najpovoljnijeg ponuđača u odnosu na osnivanje društva te drugi uslovi, obaveze i odnosi odabranog najpovoljnijeg ponuđača, odnosno koncesionara i davatelja koncesije.

(5) Opis predmeta koncesije (tehničke specifikacije) ne smije ograničavati tržišno natjecanje u postupku dodjele koncesije.

(6) Dokumentacija za nadmetanje mora biti izrađena na način koji omogućava usporedivost ponuda za dodjele predmetne koncesije.

(7) Dokumentacija za nadmetanje može sadržavati priloge zahtijevanih dokumenata, izjava i druge obrasce.

(8) Nadležni organ je dužan utvrditi visinu garancije za ozbiljnost ponude u apsolutnom iznosu, a koja ne može iznositi više od 5% procijenjene vrijednosti koncesije.

DIO TREĆI

POSTUPAK ZA DODJELU KONCESIJE

Član 22.

(Pristupanje postupku dodjele koncesije)

(1) Vlada kantona na prijedlog resornog ministarstva donosi odluku o pristupanju postupku za dodjelu koncesije za koncesije iz člana 8. ovog Zakona.

(2) Načelnik općine na prijedlog resorne službe donosi odluku o pristupanju postupku za dodjelu koncesije iz člana 9. ovog Zakona.

Član 23.

(Konkurs za dodjelu koncesija)

(1) Po donošenju odluke iz člana 22. ovog Zakona Komisija za koncesije raspisuje javni konkurs (tender) za dodjelu koncesije i sprovodi postupak za dodjelu koncesije.

(2) Javni konkurs:

- a. naziv i adresu koncesora,
- b. predmet i opis koncesije,
- c. prirodu i obim djelatnosti koncesije,
- d. procijenjenu vrijednost koncesije,
- e. mjesto obavljanja djelatnosti koncesije,
- f. rok trajanja koncesije,
- g. definiciju ekonomskih i pravnih uslova,
- h. principe i metode izračunavanja naknade za koncesiju,
- i. minimalni iznos naknade za koncesiju i naknade za učešće u javnom konkursu,
- j. opis sredstava i imovine koja se daje na raspolaganje koncesionaru,
- k. kriterije koji će se primjenjivati za izbor najpovoljnijeg ponuđača,
- l. rok za dostavljanje ponuda po javnom konkursu,
- m. spisak potrebnih dozvola i odobrenja ili ovlaštenja,
- n. lične, stručne, tehničke i finansijeke uslove koje moraju zadovoljiti ponuđači,
- o. naznaku da će se neblagovremene ili nepotpune ponude odbaciti,
- p. druge podatke u skladu sa posebnim zakonom.

(3) Sastavni dio javnog konkursa čini tenderska dokumentacija.

(4) Tenderska dokumentacija je dokumentacija iz člana 20. i 21. ovog Zakona i nacrt ugovora o koncesiji koju može podići svako zainteresovano lice uz naknadu.

(5) Izuzetno od odredbe stava 4. ovog člana lice koje je sačinilo i prethodno dostavilo nadležnom organu za dodjelu koncesije studiju ili elaborat o ekonomskoj opravdanosti dotične koncesije može podići tendersku dokumentaciju bez naknade.

Član 24.

(Kriteriji za izbor najpovoljnije ponude)

(1) Kriteriji na kojima koncesor temelji izbor najpovoljnije ponude mogu biti:

- a. najviša ponuđena naknada za koncesiju, ili
- b. ekonomski najpovoljnija ponuda.

(2) U slučaju da se prilikom izbora najpovoljnije ponude koristi kriterij najviša ponuđena naknada za koncesiju, osnovni kriterij na osnovu kojeg se vrši izbor najpovoljnije ponude je vrijednost ponuđene naknade izražene u novcu za cijeli period trajanja koncesije.

(3) U slučaju da se izbor najpovoljnije ponude vrši na osnovu kriterija ekonomski najpovoljnije ponude sa stanovišta davaoca koncesije, kriteriji na kojima se zasniva ekonomski najpovoljnija ponuda su cijena, kvalitet, visina naknade, tehničko dostignuće, estetske, funkcionalne i ekološke osobine, operativni troškovi, ekonomičnost, servisiranje nakon predaje i tehnička pomoć, datum isporuke i rokovi isporuke ili rokovi završetka radova.

Član 25.

(Objava javnog konkursa)

Javni konkurs za dodjelu koncesije objavljuje se najmanje u jednom dnevnom listu koji se distribuira i prodaje na teritoriji Federacije i službenoj internet stranici Kantona.

Član 26.

(Rokovi za podnošenje ponuda)

(1) Rok za podnošenje ponuda po javnom konkursu ne može biti kraći od petnaest, niti duži od 90 dana, računajući od narednog dana od dana objavljivanja javnog konkursa.

(2) Odredbe člana 22. i 23. ovog zakona neće se primjenjivati u slučaju obnove ugovora o koncesiji iz člana 42. ovog Zakona.

Član 27.

(Komisija za koncesije)

(1) Za provođenje procedura i postupaka dodjele koncesija u skladu sa ovim Zakonom, Vlada Kantona osniva Komisiju za koncesije Bosansko-podrinjskog kantona Goražde (u daljem tekstu: Komisija za koncesije).

(2) Rješenjem o imenovanju Komisije za koncesije imenuje se predsjednik, članovi Komisije za koncesije i sekretar Komisije za koncesije.

- (3) Komisija za koncesije se sastoji od 5 (pet) stalnih članova, računajući i predsjednika komisije, i 2 (dva) privremena člana imenovani od strane nadležnog organa, a biraju se iz reda istaknutih stručnjaka iz oblasti prava, ekonomije, tehničkih i drugih struka.
- (4) Predsjednik Komisije za koncesije mora biti diplomirani pravnik sa najmanje pet godina radnog iskustva u struci računajući od dana diplomiranja.
- (5) Komisija za koncesije ima Sekretara komisije koji ne učestvuje u odlučivanju Komisije.
- (6) Pet stalnih članova Komisije za koncesije i sekretar Komisije za koncesije biraju se u skladu sa Zakonom o ministarskim, vladinim i drugim imenovanjima u Federaciji BiH (sluzbene novine br: 12/03, 34/03, 65/13), a dva privremena člana se imenuju Rješenjem nadležnog organa koji je davaoc koncesije.
- (7) Komisija za koncesije ima mandat i ista se imenuje na period od 4 (četiri) godine.

Član 28.

(Nadležnosti Komisije za koncesije)

- (1) Nadležnosti Komisije za koncesije su:
 - a. pomoć koncesoru pri pripremi potrebnih analiza i/ili studija opravdanosti dodjele koncesije, pri pripremi i izradi uslova i dokumentacije za nadmetanje, pravila i uslova za ocjenu ponuđača, pri izadi nacrta ugovora i primljenih ponuda te kriterija za izbor ponude,
 - b. analiza projektnog prijedloga koncesije radi utvrđivanja radi li se o projektu javno-privatnog partnerstva, kako je određen propisima kojima se uređuje javno-privatno partnerstvo,
 - c. priprema, raspisivanje i provođenje javnog konkursa za dodjelu koncesije,
 - d. pregled i ocjena pristiglih ponuda,
 - e. utvrđivanje prijedloga odluke o izboru najpovoljnijeg ponuđača za dodjelu koncesije ili prijedloga odluke o poništenju postupka davanja koncesije uz obrazloženje tih prijedloga,
 - f. obavljanje ostalih poslova potrebnih za provedbu postupka dodjele koncesije,
 - g. obavljanje poslova utvrđenih propisima koji se odnose na oblast javno-privatnog partnerstva.
- (2) Komisija radi i odlučuje na sjednicama, te o svom radu vodi zapisnik koji potpisuju svi članovi Komisije.
- (3) Komisija za koncesije radi u skladu sa Poslovníkom o radu.
- (4) Za obavljanje određenih stručnih poslova koncesor može, po potrebi, angažovati stručna, savjetodavna, te specijalizovana tijela ili eksperte za ekonomsko-finansijsku, pravnu, ili tehničku oblast.

Član 29.

(Sredstva za rad Komisije)

- (1) Sredstva za rad i obavljanje poslova iz djelokruga Komisije osiguravaju se u budžetu Kantona i u budžetu organa uprave i/ili jedinice lokalne samouprave imenovane Rješenjem nadležnog organa za troškove privremenih članova komisije.
- (2) Komisiji pripada naknada koju za stalne članove komisije svojom odlukom utvrđuje Vlada Kantona, a naknada za privremene članove utvrđuje se Aktom nadležnog organa uprave i jedinice lokalne samouprave.

Član 30.

(Način dostavljanja ponuda)

- (1) Ponude na javni konkurs za dodjelu koncesije, zajedno sa svom potrebnom dokumentacijom, dostavljaju se Komisiji za koncesije u formi zatvorene ponude na kojoj je naznačeno «*Ponuda na javni konkurs za dodjelu koncesije*».
- (2) Na zatvorenoj ponudi unose se podaci o tačnom nazivu ponuđača, njegovom sjedištu, kontakt licu koje ima status ovlaštenog lica ponuđača i brojem telefona ovlaštenog lica ponuđača.

Član 31.

(Obavještenje o terminu otvaranja ponuda)

- (1) Po isteku roka za podnošenje ponuda po javnom konkursu, Komisija za koncesije odmah najkraćim putem (telefon, faks, e-mail) obavještava sve ponuđače o mjestu, datumu i vremenu otvaranja ponuda, uz napomenu da pošalju na otvaranje ponuda svoje ovlaštene predstavnike i da će se otvaranje ponuda izvršiti i u slučaju da zakazanoj sjednici Komisije za koncesije za otvaranje ponuda ne budu prisutni ovlašteni predstavnici ponuđača.
- (2) Otvaranje ponuda je javno, osim u slučajevima predviđenim posebnim propisima koji ograničavaju prisustvo javnosti, ukoliko se takvi slučajevi pojave.

Član 32.

(Postupanje po jednoj dostavljenoj ponudi)

- (1) Postupak otvaranja ponuda izvršice se i u slučaju ako je po javnom konkursu za dodjelu koncesija pristigla samo jedna ponuda.
- (2) U slučaju iz stava (1) ovog člana Komisija za koncesije može predložiti dodjelu koncesije takvom ponuđaču, ako ponuda zadovoljava sve uslove utvrđene u javnom konkursu i uz pozitivno Mišljenje Komisije za koncesije o opravdanosti dodjele predmetne koncesije.
- (3) U slučaju da Vlada Kantona ne prihvati pozitivno mišljenje iz stava (2) ovog člana, prijedlog Komisije za koncesije se odbija.

Član 33.

(Otvaranje ponuda)

- (1) Na sjednici Komisije za koncesije po javnom konkursu za dodjelu koncesija vodi se zapisnik u kome se, između ostalog, evidentira: mjesto, prostorije, dan i sat početka i završetka sjednice, imena lica imenovanih u Komisiju za koncesije, podaci o prisutnim ovlaštenim predstavnicima ponuđača, broj neblagovremeno primljenih ponuda koje se neće uzeti u razmatranje, broj blagovremeno primljenih ponuda sa nazivima ponuđača i o najkraćim podacima o svakoj ponudi, kao i nepotpunih ponuda.
- (2) Na zahtjev ovlaštenog predstavnika ponuđača unose se njegove primjedbe na sadržaj zapisnika i izjava o pojašnjenju ili preciziranju ponude.
- (3) Zapisnik potpisuju sva lica prisutna sjednici i sekretar Komisije za koncesije.
- (4) Potpisivanjem zapisnika završen je postupak otvaranja ponuda.

Član 34.

(Pregledanje i ocjenjivanje ponuda)

- (1) Najkasnije naredni dan po danu održavanja sjednice Komisije za koncesije za otvaranje ponuda, komisija za koncesije pristupa detaljnoj provjeri kompletnosti i podobnosti svih ponuda, evidentira eventualne računске i druge greške u ponudama, upoređuje podatke iz ponuda sa javnom konkursom i tenderskom dokumentacijom iz člana 20. ovog zakona, utvrđuje eventualna odstupanja iz ponuda i razmatra svu priloženu dokumentaciju uz ponude.
- (2) Komisija za koncesije sastavlja izvještaj u kome se daju osnovni i najkraći podaci o svakoj ponudi, ocjena o podobnosti ponuđača i mišljenje o najpovoljnijoj ponudi po javnom konkursu za dodjelu koncesije.
- (3) Pri utvrđivanju svog mišljenja o najpovoljnijoj ponudi Komisija za koncesije uzima u obzir naročito slijedeće kriterije:
 - a. ekonomske i finansijske pokazatelje koncesije u skladu iz uslova iz plana koncesije (visina naknade i vrijednost dodatnih kriterija),
 - b. podobnost ponuđača u finansijskom, organizacionom i kadrovskom pogledu, kao i pogledu tehničke opremljenosti prije početka korištenja koncesije;
 - c. uticaj koncesije na razvoj privrede područja na kojem se koncesija treba da koristi, a posebno;
 1. obim privredne djelatnosti koncesionara u oblasti koja je predmet koncesije,
 2. efekti po pitanju zapošljavanja i smanjenja broja nezaposlenih u toku korištenja koncesije,
 3. drugi indirektni efekti,
 - d. racionalnija tehnologija s aspekta korištenja prirodnih bogatstava ili dobra u općoj upotrebi, ili vršenja javnih radova ili javnih usluga,
 - e. povoljnija tehnička rješenja;
 - f. učešće domaćih privrednih društava, domaće opreme i sirovina koje ponuđač namjerava angažovati, odnosno nabaviti za potrebe korištenja koncesije.

- g. uticaj koncesije na održivo povećanje korištenja obnovljivih izvora energije,
- h. mjere koje ponuđač namjerava izvršiti u cilju revitalizacije obnovljivog prirodnog bogatstva ili rekultivacije neobnovljivog prirodnog bogatstva.

(4) Odabir najpovoljnije ponude ne smije biti diskriminatorski prema bilo kojem ponuđaču.

(5) Ponuda u kojoj je ponudeno plaćanje najvišeg iznosa naknade za korištenje koncesije ne znači ujedno i najpovoljniju ponudu.

Član 35.

(Dostavljanje Izvještaja i zapisnika o otvaranju ponuda)

(1) Izvještaj iz člana 34. ovog Zakona uz koji je priložen zapisnik iz člana 33. ovog Zakona sa svim konkursnim materijalom Komisija za koncesije u roku od 7 dana od dana otvaranja dostavlja nadležnom organu iz člana 22. ovog Zakona.

(2) Uz dokumentaciju iz stava (1) ovog člana, Komisija za koncesije utvrđuje i dostavlja prijedlog odluke o odabiru najpovoljnijeg ponuđača ili prijedlog odluke o poništenju postupka dodjele koncesije uz obrazloženja tih prijedloga odluka.

Član 36.

(Predlaganje dodjele koncesije)

(1) Komisija za koncesije priprema izvještaj o koncesiji s prijedlogom najpovoljnijeg ponuđača koji je ispunio i zadovoljio sve kriterije iz konkursa i tenderske dokumentacije i čija ponuda ima prednost nad ostalim ponudama.

(2) Izvještaj iz stava (1) ovog člana odmah se dostavlja na razmatranje nadležnom organu iz člana 22. ovog Zakona.

Član 37.

(Otvaranje jedne pristigle ponude)

Odredbe člana 32. do 34. ovog Zakona na odgovarajući način primjenjuju se na slučajeve u kojima je na javni konkurs za dodjelu koncesije podnesena samo jedna ponuda (član 32).

Član 38.

(Dodjela koncesije)

Vlada kantona na prijedlog Komisije za koncesije iz člana 35. stav (2) ovog Zakona donosi odluku o dodjeli koncesije i ista se objavljuje u „Službenim novinama Bosansko-podrinjskog kantona Goražde”.

Član 39.

(Odluka o dodjeli koncesije)

- (1) Koncesor na prijedlog Komisije za koncesije donosi odluku o izboru najpovoljnijeg ponuđača, ako su ispunjeni svi uslovi i kriteriji utvrđeni u javnom konkursu.
- (2) Koncesor na prijedlog Komisije, može donijeti odluku iz prethodnog stava i u slučaju ako je na javni poziv pristigla samo jedna ponuda.
- (3) Odluka iz stava (1) ovog člana dostavlja se svim učesnicima javnog konkursa.
- (4) Odluka o izboru najpovoljnijeg ponuđača obavezno sadrži:
 - a. naziv koncesora s brojem i datumom donošenja odluke,
 - b. naziv ponuđača,
 - c. predmet koncesije,
 - d. prirodu, obim i mjesto obavljanja djelatnosti koncesije,
 - e. rok na koji će se zaključiti ugovor o koncesiji,
 - f. posebne uslove kojima tokom trajanja koncesije mora udovoljavati ponuđač,
 - g. iznos naknade za koncesiju ili osnovu za utvrđivanje iznosa naknade za koncesiju koju će koncesionar plaćati,
 - h. rok u kojem je najpovoljniji ponuđač obavezan potpisati ugovor o koncesiji s koncesorom,
 - i. obrazloženje razloga za izbor ponuđača,
 - j. pouka o pravnom lijeku.
- (5) Protiv Odluke koncesora iz stava (1) ovog člana nije dozvoljena žalba, ali se može pokrenuti upravni spor pred Kantonalnim sudom u Goraždu.

DIO ČETVRTI

PERIOD NA KOJI SE DODJELJUJE KONCESIJA

Član 40.

(Period na koji se dodjeljuje koncesija)

- (1) Ugovor o koncesiji zaključuje se na određeno vrijeme s tim da to razdoblje ne može biti kraće od pet niti duže od 30 godina i isti u slučaju postojanja javnog interesa može se obnoviti za period koji ne može biti duži od polovine prvobitno ugovorenog roka.
- (2) Trajanje koncesije će se odrediti na način koji ne ograničava tržišno nadmetanje više nego što je to nužno kako bi se osigurala amortizacija ulaganja koncesionara i razuman povrat uloženog kapitala, istovremeno uzimajući u obzir rizik koji je povezan s privrednim korištenjem koncesije.
- (3) Koncesija po ovom zakonu dodjeljuje se:
 - a. za koncesije iz člana 8. tačke e., f., g., h., i., j. i n. na vrijeme trajanja do pet godina;
 - b. za sve ostale koncesije iz člana. 8 i 9. ovog zakona do 30 godina.

(4) Za koncesije za koje je potrebno izgraditi značajnije objekte, ugraditi postrojenja i nabaviti stvari koje neposredno služe za korištenje koncesije, vrijeme na koje je koncesija dodjeljena racuna se narednog dana od dana roka određenog u ugovoru o koncesiji za izgradnju tih objekata, ugradnju postrojenja i nabavku stvari.

(5) Koncesionaru koji, u smislu stava (4) ovog člana, u ugovorenom roku ne izgradi objekte, ne ugradi postrojenja ili ne nabavi stvari koje neposredno služe za korištenje koncesije, rok računanja početka vremena na koji je koncesija dodjeljena teče narednog dana od dana određenog u ugovoru koncesije za izgradnju objekata, ugradnju postrojenja i nabavku stvari.

Član 41.

(Produženje vremena na koje je dodjeljena koncesija)

(1) Vrijeme na koje je dodjeljena koncesija može se produžiti u slučajevima kada se koncesija ne vrši ili ne može vršiti ili se vrši u smanjenom obimu:

- a. ako nastupi pripravno, mobilno ili ratno stanje;
- b. ako usljed elementarnih nepogoda (zemljotres, velike poplave i slično) ili požara ili havarija na objektima koji služe za ostvarivanje koncesije, nastanu štete ili velika oštećenja zbog kojih se objekti, postrojenja i stvari ne mogu koristiti za određeni period vremena;
- c. kada je u skladu sa potrebama javnog interesa upravnim aktom koncesora naloženo koncesionaru da smanji obim korištenja koncesije ili da se u korištenju koncesije prilagodi s novonastalim stanjem ili potrebama veće zaštite okoline od uticaja korištenja koncesije.

(2) Na zahtjev koncesionara koncesor je dužan prihvatiti izmjene ugovora o koncesiji u pogledu produženja vremena na koje je koncesija dodjeljena i to za najmanje onoliko vremena koliko su trajale okolnosti iz stava (1) ovog člana i za vrijeme za koje se mogla izvršiti sanacija objekata, postrojenja ili nabavke stvari.

Član 42.

(Obnova ugovora o koncesiji)

(1) Ugovor o koncesiji može se obnoviti po isteku vremena na koje je koncesija dodjeljena.

(2) Obnova ugovora o koncesiji može se izvršiti za novi period koji ne može biti duži od polovine prvobitno ugovorenog roka.

(3) Obnova ugovora može se izvršiti samo u slučaju ako za to postoji javni interes i ako je koncesionar u toku trajanja vremena na koje je koncesija prvobitno dodjeljena u potpunosti i blagovremeno izvršavao sve obaveze iz ugovora o koncesiji.

(4) Izuzetno od stava (2) ovog člana obnova ugovora o koncesijama iz člana 10. ovog Zakona može se vršiti za nove periode koji ne mogu biti duži od prethodno ugovorenog vremena trajanja koncesije.

DIO PETI
UGOVOR O KONCESIJI

Član 43.

(Ugovor o koncesiji)

- (1) Na osnovu odluke Vlade kantona iz člana 38. ovog zakona zaključuje se ugovor o koncesiji.
- (2) Ugovor o koncesiji zaključuju koncesor i koncesionar.
- (3) Na nacrt Ugovora obavezno se pribavlja mišljenje Kantonalnog pravobranilaštva.

Član 44.

(Sadržaj Ugovora o koncesiji)

- (1) Ugovor o koncesiji sadrži naročito:
 - a. ugovorne strane,
 - b. predmet koncesije,
 - c. broj i vrsta odobrenja za vršenje djelatnosti iz predmeta koncesije,
 - d. uslove, način i vrijeme korištenja predmeta koncesije,
 - e. određivanje i usklađivanje tarifa (količine, kvote, i sl),
 - f. visinu i dinamiku plaćanja koncesione naknade,
 - g. uslovi i rokovi plaćanja,
 - h. vrijednosti , uslovi i rokovi investiranja i zapošljavanja,
 - i. elemente u vezi finansiranja projekta,
 - j. dobra, sredstva, imovinu i/ili ovlaštenja koju na raspolaganje dobiva koncesor,
 - k. radnje vezane za dobijanje potrebnih ovlaštenja za provođenje aktivnosti u skladu sa ugovorom o koncesiji,
 - l. prava i obaveze ugovornih strana, uključujući i obaveze pružanja sigurne usluge korisnicima po najnižim cijenama,
 - m. obaveze koncesionara u oblasti zaštite okoliša,
 - n. obavezu revitalizacije obnovljivog prirodnog bogatstva, odnosno rekultivaciju neobnovljivog prirodnog bogatstva,
 - o. obavezu upisa Ugovora o koncesiji u zemljišne knjige i druge registre u skladu sa zakonom,
 - p. mjere finansijskog obezbjeđenja ugovora,
 - q. postupanje koncesionara sa predmetima nađenim u toku korištenja predmeta koncesije, a koji predstavljaju vrijednost prirodnog, historijskog, kulturnog i/ili graditeljskog nasljeđa Bosne i Hercegovine,
 - r. postupanje koncesionara u slučaju kada bi daljnje korištenje predmeta koncesije ugrožavalo nalazište, odnosno vrijednost i cjelinu predmeta koji predstavljaju vrijednost prirodnog, historijskog, ili historijsko – kulturnog i/ili graditeljskog nasljeđa Bosne i Hercegovine,
 - s. opis događaja koji se smatraju višom silom,
 - t. sankcije i naknade za neispunjavanje obaveza ugovornih strana,
 - u. prekid ugovora i postupak u slučaju prekida ugovora,

- v. raskid ugovora i postupak u slučaju raskida ugovora prije datuma prestanka utvrđenog ugovorom,
- w. uslove za obnavljanje ugovora,
- x. način rješavanja sporova, uključujući i međunarodnu arbitražu, ako se ugovorne strane o tome dogovore i ugovorenu nadležnost suda,
- y. prenos prava vlasništva na nekretninama (objekti i zemljišta) postrojenjima i stvarima koja neposredno služe za ostvarivanje koncesije na kanton, bez naknade koncesionaru, u slučaju prestanka koncesije zbog protoka vremena na koji je koncesija data, kao i upis prava vlasništva u korist kantona bez posebne saglasnosti ili odobrenja koncesionara (klauzula intabulandi)
- z. ostale elemente bitne za predmet koncesije.

(2) Ugovorom o koncesiji određuju se prava i obaveze davaoca koncesije i koncesionara u skladu s odredbama ovog Zakona, te posebnih propisa kojima se uređuje određena koncesija.

(3) Na pitanja iz ugovora o koncesiji koja nisu uređena ovim Zakonom primjenjuju se odredbe propisa kojima se uređuju obligacioni odnosi.

(4) U slučaju da koncesionar nije registrovan sa sjedištem na području Kantona, u ugovor se obavezno unose odredbe obavezne registracije osnivanja privrednog društva sa sjedištem na području Kantona i sa najmanje dva stalno zaposlena radnika.

(5) U slučaju koncesije koja je sastavni dio projekta javno-privatnog partnerstva odgovarajuće se primjenjuje i propis kojim se uređuje sadržaj ugovora o javno-privatnom partnerstvu.

Član 45.

(Registar koncesija)

- (1) Registar koncesija jedinstvena je elektronska evidencija koncesija datih na području Kantona.
- (2) Jedinstveni registar svih zaključenih ugovora o koncesiji vodi Ministarstvo za finansije Bosansko-podrinjskog kantona Goražde.
- (3) Registrom koncesija garantuje se dostupnost javnosti podataka.
- (4) Javnim podacima smatraju se: naziv davaoca koncesije, matični broj davaoca koncesije, datum početka ostvarivanja koncesije, naziv (vrsta) koncesije, lokacija koncesije, te važeći koeficijent za obračun koncesione naknade, koja se utvrđuje na osnovu procenta ostvarene dobiti koncesionara.
- (5) U registar koncesija evidentiraju se i ranije zaključeni ugovori o koncesijama kojima do dana stupanja na snagu ovog zakona nije istekao rok trajanja koncesije, te svi ugovori koji će se zaključiti nakon stupanja na snagu ovog Zakona.
- (6) Ministarstvo za finansije donosi Pravilnik o obrazovanju i vođenju registra koncesija u roku od 3 mjeseca od dana stupanja na snagu ovog Zakona.

DIO ŠESTI
IZMJENE UGOVORA O KONCESIJI I OTKUP KONCESIJE ZA VRIJEME NA KOJE JE
KONCESIJA DODJELJENA

Član 46.

(Izmjene ugovora o koncesiji)

(1) U toku trajanja ugovora o koncesiji, koncesor obavezno pokreće proceduru izmjene ugovora o koncesiji u slijedećim slučajevima ako:

- a. se koncesija koristi na način da ne ispunjava javni interes u skladu sa ovim Zakonom,
- b. je koncesija pod uslovima pod kojima je dodjeljena postala opasna po život i zdravlje ljudi, državnu sigurnost, javni mir i poredak, javnu bezbjednost, javni moral ili za privredu;
- c. u vremenu trajanja koncesije nastanu promjene zbog kojih je u javnom interesu potrebno ograničiti obim korištenja koncesije ili tražiti da se koncesionar prilagodi novonastalom stanju;
- d. nastupe nepredviđeni događaji kao što su pripravnno, mobilno i ratno stanje, zbog kojih događaja je moguće da na određeno vrijeme prestane korištenje koncesije;
- e. nastupe elementarne nepogode većih razmjera (zemljotres ili dugotrajne visoke vode vodotoka) ili požari ili eksplozije, ili havarije, zbog kojih je došlo do uništenja ili većeg oštećenja objekata, postrojenja i stvari koje neposredno služe za ostvarivanje koncesije i time potreba za dogradnjom (sanacijom objekata i postrojenja) i nabavkom novih stvari;
- f. dalje korištenje koncesije ugrožava nalazište, odnosno vrijednost i cjelinu predmeta koji predstavljaju vrijednost prirodnog, historijskog i / ili historijsko-kulturnog i / ili graditeljskog naslijeđa Bosne i Hercegovine.

(2) Ugovor o koncesiji se obavezno mijenja u slučaju da postojeći ugovori o datim koncesijama ne ispunjavaju uslove koji su propisani ovim Zakonom.

(3) U slučajevima iz stava (1) ovog člana koncesor donosi konstitutivni upravni akt kojim mijenja uslove pod kojima je koncesija dodjeljena ranijim upravnim aktom koncesora.

(4) Za izmjene ugovora o koncesiji u skladu sa stavom (1), (2) i (3) ovog člana nije potrebna saglasnost koncesionara, koji je te izmjene dužan prihvatiti ili odustati od daljeg korištenja koncesije.

Član 47.

(Naknada štete)

Kod izmjene ugovora o koncesiji zbog razloga utvrđenih u članu 46. stav 1. tački a, b i f. ovog zakona koncesionar ima pravo na naknadu stvarne štete od koncesora, bez prava na naknadu štete zbog izmakle (izgubljene) dobiti.

Član 48.

(Otkup ugovora o koncesiji)

- (1) Kada štete od korištenja koncesije prevazilaze koristi koje Kanton ima od korištenja te koncesije, koncesor je obavezan da donese konstitutivni upravni akt o otkupu ugovora o koncesiji za vrijeme trajanja ugovora o koncesiji.
- (2) Akt iz stava (1) ovog člana donosi se uvijek u slučaju kada za to postoji javni interes, a naročito u slučajevima propisanim u članu 46. stav (1) tačke.a.,b. i f. ovog Zakona.
- (3) Za otkup ugovora o koncesiji, u smislu stava (1) i (2) ovog člana, nije potrebna saglasnost koncesionara.
- (4) U slučaju otkupa ugovora o koncesiji koncesionar ima pravo na naplatu stvarne štete od koncesora, ali bez prava na naknadu štete zbog izmakle dobiti.

DIO SEDMI

PRIJENOS KONCESIJE

Član 49.

(Prijenos koncesije)

- (1) Prava i obaveze koncesionara iz ugovora o koncesiji mogu se na prijedlog koncesionara prenijeti na drugo lice – novog koncesionara samo uz saglasnost koncesora.
- (2) Prilikom razmatranja zahtjeva za dobijanje saglasnosti iz stava (1) ovog člana, koncesor uzima u obzir:
 - a. finansijsko stanje predloženog novog koncesionara,
 - b. stručnost i sposobnost predloženog novog koncesionara da pruža usluge i izvršava svoje obaveze iz ugovora o koncesiji i
 - c. uticaj koji će data koncesija imati na koncentraciju vlasništva u određenom sektoru djelatnosti.
- (3) Novi koncesionar preuzima prava i obaveze prethodnog koncesionara.
- (4) U slučaju iz stava (1) ovog člana koncesor donosi odgovarajući upravni akt.
- (5) Novi koncesionar ne može imati veća prava i obaveze od prethodnog koncesionara.
- (6) Novi koncesionar dužan je platiti jednokratnu naknadu za pravo korištenja koncesije, koja ne može biti manja od jednokratne naknade koju je platio koncesionar sa kojeg se koncesija prenosi.
- (7) Prijenos prava i obaveza na novog koncesionara vrši se novim ugovorom o koncesiji.

(8) Ukoliko je raniji koncesionar platio jednokratnu koncesionu naknadu za pravo korištenja koncesije, odredbe stava (6) ovog člana neće se primjenjivati u slučaju prenosa koncesije koja se vrši u skladu sa obavezama iz ugovora propisanih članom 44. stav (4) ovog Zakona.

DIO OSMI

PRUŽANJE POMOCI KONCESIONARU

Član 50.

(Pomoć koncesionaru)

(1) Kada koncesionar bez svoje krivice dođe u finansijske poteškoće zbog kojih može doći do prestanka korištenja koncesije ili bitnog smanjenja obima korištenja koncesije, a u javnom interesu je da se i dalje koristi koncesija po kojoj koncesionar pruža usluge građanima i pravnim licima, nadležni organ će pružiti finansijsku pomoć koncesionaru.

- (2) Finansijska pomoć koncesionaru pruža se:
- a. oslobađanjem obaveze koncesionara od plaćanja u cjelini ili dijelom naknade za korištenje koncesije za određeni period;
 - b. davanjem saglasnosti koncesionaru da poveća visinu jedinične cijene naknade (tarife) za pružanje usluga građanima i pravnim licima iz osnova korištenja koncesije.
 - c. sufinansiranjem operativnih troškova i učešćem u ulaganju u stalna sredstva u slučaju da se radi o projektu javno-privatnog partnerstva.

Član 51.

(Postupak u slučaju pomoći)

(1) Pomoć koncesionaru, u skladu sa članom 50. ovog Zakona, utvrđuju se upravnim aktom nadležnog organa.

(2) Na temelju upravnog akta iz stava (1) ovog člana zaključuje se aneks ugovora o koncesiji.

(3) Troškovi pružanja finansijske pomoći padaju na teret Budžeta nadležnog organa koji je odobrio finansijsku pomoć iz člana 50. stav (2) ovog zakona.

DIO DEVETI

RJEŠAVANJE SPORNIH PITANJA U VEZI NADLEŽNOSTI ZA DODJELU KONCESIJA I SPOROVA IZMEĐU KONCESORA I KONCESIONARA

Član 52.

(Rješavanje sporova)

(1) Za rješavanje sporova u pogledu ispunjavanja ugovorom preuzetih obaveza od strane koncesora i koncesionara nadležan je sud u Goraždu.

(2) Sporove koji nastanu u vezi nadležnosti za dodjelu koncesije između Federacije i Kantona dogovorno rješavaju Specijalna zajednička komisija za koncesije utvrđena Zakonom o koncesijama ("Službene novine Federacije Bosne i Hercegovine", br. 40/02 i 61/06) i Komisija za koncesije iz člana 23. ovog Zakona.

Član 53.

(Nadležnost za rješavanje sporova)

(1) U slučaju da se u roku od šest mjeseci ne rješi spor u vezi nadležnosti za dodjelu koncesije iz člana 52. stava (2) ovog člana, spor će rješavati sud u Gorazdu.

(2) Za sporove koji nastanu u vezi nadležnosti za dodjelu koncesija između kantona zatražit će se arbitraža komisije iz člana 52. stava (2) ovog Zakona.

(3) Za sporove koji nastanu u vezi nadležnosti za dodjelu koncesija, a kada se određeno dobro nalazi na području dvije ili više općina Kantona, formirat će se Zajednička komisija čiji su članovi predstavnici Kantona i općina na čijem se području nalazi predmet koncesije.

DIO DESETI

PRAVNA SIGURNOST KONCESIONARA I PRAVNA ZAŠTITA KONCESIONARA

Član 54.

(Pravni status koncesionara)

(1) Koncesionar je pravno ili fizičko domaće ili strano lice sa kojim koncesor zaključuje ugovor o koncesiji i koji ima prava i obaveze utvrđene ugovorom u skladu sa ovim Zakonom.

(2) Koncesionar ima pravo posjedovanja i korištenja sredstava i imovine koje mu koncesor stavlja na raspolaganje, u skladu sa ugovorom o koncesiji.

(3) Koncesionar je dužan obavljati djelatnost koja je utvrđena kao predmet koncesije u ugovoru o koncesiji i ne može je proširiti mimo obima utvrđenog ugovorom o koncesiji.

(4) U slučaju izmjene propisa koji regulišu oblast koncesija u vrijeme trajanja koncesionog ugovora, izmjene se primjenjuju na postojeće koncesione ugovore, što će se detaljnije regulisati aneksima ugovora.

Član 55.

(Zaštita koncesionara)

(1) Zabranjeno je sprječavati ili ometati koncesionara u ostvarivanju koncesije.

(2) Nadležni organi dužni su koncesionaru na njegov zahtjev pružiti pravnu pomoć i pravnu zaštitu u slučaju ako treća lica onemogućavaju ili otežavaju koncesionaru korištenje koncesije.

(3) Zakoni koji stupe na snagu nakon zaključenja ugovora o koncesiji i za vrijeme na koje je koncesija dodjeljena neće se primjenjivati na koncesionara ako su ti zakoni nepovoljniji za

koncesionara, odnosno ako bi uticali na smanjenje prava a povećanje obaveza koncesionara u odnosu na ona utvrđena aktom o dodjeli koncesije i ugovorom o koncesiji.

DIO JEDANEASTI **PRESTANAK KONCESIJE**

Član 56. *(Prestanak koncesije)*

- (1) Ugovor o koncesiji prestaje da važi:
- a. protekom vremena na koje je koncesija dodjeljena,
 - b. ako je koncesionaru pravosnažnom odlukom nadležnog suda ili organa uprave zabranjeno obavljanje djelatnosti za koju je koncesija dodjeljena,
 - c. otvaranjem stečajnog postupka nad koncesionarom,
 - d. ako je koncesionar bankrotirao,
 - e. sporazumnim raskidom ugovor o koncesiji.
- (2) U slučaju prestanka važenja ugovora o koncesiji iz razloga navedenih u tački e. stava (1) ovog člana kada postoji javni interes da se obavljanje koncesije vrši određeno vrijeme i poslije prestanka ugovora o koncesiji dok koncesor ne osigura da vršenje koncesije nastavi da vrši drugi koncesionar ili na drugi način organizuje vršenje koncesije, koncesionar je obavezan da za to vrijeme obavlja poslove iz ugovora o koncesiji.

Član 57. *(Raskid Ugovora)*

Ugovor o koncesiji može se raskinuti ako:

- a. ako koncesionar ne plati naknadu za koncesije utvrđene ugovorom o koncesiji tri mjeseca od dana dospijeca obaveze,
- b. ako koncesionar ne ispuni svoje ostale obaveze iz ugovora o koncesiji u roku od šest mjeseci od ugovorenog roka,
- c. ako obavlja djelatnost na način suprotan odredbama koncesionog ugovora.

Član 58. *(Prekid ugovora)*

- (1) Ugovor o koncesiji se prekida:
- a. ako se vršenjem koncesione djelatnosti ugrožava životna sredina i zdravlje ili zakonom zaštićena područja i objekti, što se u vremenu davanja koncesije nije moglo predvidjeti,
 - b. u slučaju nemogućnosti obavljanja djelatnosti zbog znatnijeg oštećenja objekta koncesije koje nije skrivio ili koje nije posljedica grube nepažnje koncesionara i
 - c. u drugim slučajevima predviđenim ugovorom o koncesiji.
- (2) Koncesioni odnos se nastavlja kad prestanu okolnosti predviđene u stavu (1) tačke a., b. i c. ovog člana.

Član 59.

(Ostali slučajevi raskida ugovora)

- (1) Ugovor o koncesiji može se raskinuti prije isteka roka na koji je koncesija dodjeljena, ako:
 - a. koncesionar nije u ugovorenom roku započeo, odnosno završio izgradnju objekata odnosno ugradnju postrojenja;
 - b. koncesionar kontinuirano u roku dužem od dva mjeseca prestane obavljati djelatnost za koju mu je koncesija dodjeljena, a prava i obaveze koncesionara ne preuzme novi koncesionar;
 - c. ako koncesionar samovoljno izvrši promjene na objektima i uređajima koje neposredno koristi pri ostvarivanju koncesije, odnosno samovoljno mijenja uslove pod kojima je koncesija dodjeljena ili ne održava u funkcionalnom stanju objekte i postrojenja koja služe za ostvarenje koncesije, radi čega nastaje opasnost nastajanja štete na prirodnom bogatstvu, ili dobru u općoj upotrebi, ili na vršenje komunalne ili druge javne službe, ili štete na objektima infrastrukture ili do povrede zakonitih prava trećih lica, a u roku koji odredi nadležni kantonalni inspektor ne uspostavi predašnje stanje.
- (2) Koncesor odlučuje o raskidu ugovora o koncesiji iz razloga utvrđenih u stavu (1) ovog člana.

Član 60.

(Pravo na naknadu štete)

U slučaju prestanka ugovora po članu 57. tačka b. ovog zakona, ako koncesionar ne ispuni svoje obaveze iz ugovora o koncesiji i članu 59. stav (1) ovog zakona, koncesionar nema pravo na naknadu štete od kantona, pa ni u slučaju nastanka stvarne štete za koncesionara.

Član 61.

(Obustava korištenja koncesije)

- (1) Ako u toku vremena na koje je koncesija dodjeljena nastupe znatne promjene ili razlozi zbog kojih je u javnom interesu potrebno obustaviti dalje korištenje koncesije, na prijedlog nadležnog organa raskinuće se ugovor o koncesiji.
- (2) Razlozi za raskid ugovora o koncesiji u javnom interesu iz stava (1) ovog člana su isti kao razlozi za izmjenu ugovora o koncesiji utvrđeni u članu 46. stav (1) tačka a i f. ovog Zakona.
- (3) U slučaju raskida ugovora u skladu sa stavom (1) ovog člana koncesionar ima pravo na naknadu stvarne štete od strane nadležnog organa, bez prava na naknadu štete i za izmaklu (izgublenu) dobit.

DIO DVANEASTI
PRIENOS VLASNIŠTVA NA NEKRETNINAMA, POSTROJENJIMA
I STVARIMA KOJE NEPOSREDNO SLUŽE ZA OSTVARIVANJE KONCESIJE

Član 62.

(Prijenos vlasništva)

- (1) U slučaju prestanka koncesije iz člana 56. ovog Zakona, pravo vlasništva na nekretninama (zemljište i objekti), postrojenjima i stvarima koje neposredno služe za ostvarivanje koncesije sa koncesionara prelazi na kanton, bez prava koncesionara da za to traži naknadu ili odštetu.
- (2) Upis prava vlasništva kantona na nekretninama i postrojenjima u propisane evidencije nekretnina (zemljišne knjige, katastar), odnosno upis pokretnih stvari u imovinu kantona, u skladu sa stavom (1) ovog člana, vrši se bez potrebe davanja naknadnog odobrenja ili saglasnosti koncesionara (klauzula intambulandi).
- (3) Koncesionar je dužan u roku od petnaest dana od dana isteka vremena na koje je koncesija dodjeljena da ovlaštenim predstavnicima kantona, odnosno koncesora, zapisnički preda nekretnine, postrojenja i stvari koje neposredno služe ostvarivanju koncesije slobodne od ljudi, na osnovu čega Kanton stupa u posjed nekretnina i pokretnih stvari koje su postale njegovo vlasništvo.

Član 63.

(Prenos vlasništva u slučaju raskida ugovora)

- (1) U slučaju raskida ugovora o koncesiji iz člana 57. ovog Zakona, pravo vlasništva nad nekretninama (zemljište i objekti), postrojenjima i stvarima koje neposredno služe za ostvarivanje koncesije sa koncesionara prelazi na kanton, uz pravo koncesionara da potražuje naknadu stvarnih troškova ulaganja bez prava na naknadu za izgubljenu dobit.
- (2) Nekretnina, postrojenja ili oprema iz stava (1) ovog člana koje su bile u vlasništvu koncesionara prije zaključivanja ugovora o koncesiji ostaju u vlasništvu koncesionara ukoliko je na iste polagao isključiva prava vlasništva ili prava služnosti.
- (3) U ostalim slučajevima raskida ugovora o koncesiji iz člana 59. ovog Zakona, pravo vlasništva na nekretninama (zemljište i objekti), postrojenjima i stvarima koje neposredno služe za ostvarivanje koncesije sa koncesionara prelazi na kanton, bez prava koncesionara da za to traži naknadu ili odštetu.

Član 64.

(Objava i ugovaranje prenosa vlasništva)

- (1) Prenos prava vlasništva na nekretninama, uređajima i stvarima iz člana 62. i 63. ovog zakona se kao uslov dodjele koncesije obavezno unose u javni konkurs za dodjelu koncesije, odluku o dodjeli koncesije i ugovor o koncesiji.
- (2) U Ugovor o koncesiji osim elemenata iz člana 44. ovog Zakona, unosi se i odredba čuvanja, održavanja, remontovanja i servisiranja nekretnina odnosno postrojenja, opreme i stvari koje je

koncesionar dužan kontinuirano ili periodično obavljati kako bi se u momentu prenosa vlasništva nekretnine odnosno objekti, uređaji i oprema nalazili u funkcionalnom i ispravnom stanju.

DIO TRINAESTI

RASPODJELA I NAMJENSKO KORIŠTENJE PRIHODA OD KONCESIJA

Član 65.

(Raspodjela prihoda naknada od koncesije)

(1) Sredstva ostvarena po osnovu naknade za koncesije iz člana 13. ovog Zakona za koncesije iz člana 8. i 10. ovog Zakona su namjenski prihod kantonalnog budžeta i budžeta jedinice lokalne samouprave, koji se raspoređuju se na slijedeći način:

- a. u korist budžeta kantona 40 %,
- b. u korist budžeta općine na čijoj se teritoriji nalazi predmet koncesije 40 %,
- c. u korist rezervnih sredstava 20 %.

(2) Sredstva ostvarena po osnovu naknade za koncesije iz člana 13. ovog Zakona za koncesije iz člana 9. ovog Zakona su namjenski prihod budžeta jedinice lokalne samouprave na čijoj teritoriji se nalazi predmet koncesije.

Član 66.

(Namjensko korištenje prihoda)

(1) Sredstva iz člana 65. ovog Zakona su namjenska sredstva budžeta i koriste se isključivo u svrhe i na način utvrđene ovim Zakonom.

(2) Prihodi iz člana 65. stav (1), tačka a. i b. namjenski se koriste za:

- a. izrade studija opravdanosti davanja koncesija iz člana 17. ovog Zakona,
- b. izrada planske, projektne, investicijske dokumentacije iz člana 19. ovog Zakona,
- c. izrada dokumentacije za nadmetanje iz člana 20. ovog Zakona,
- d. objava javnog konkursa iz člana 25. ovog Zakona,
- e. isplate naknade za rad komisije iz člana 27. ovog Zakona,
- f. finansiranje infrastrukturnih projekata koji doprinose razvoju područja na kojima se vrši koncesija,
- g. finansiranje projekata koji doprinose efikasnijem korištenju prirodnih bogastava, dobara u općoj upotrebi i javnih usluga koje mogu biti predmet koncesija u skladu sa ovim Zakonom,
- h. Zaštita okoliša i biodiverziteta.

(3) Prihodi iz člana 65. stav (1), tačka c. namjenski se koriste za:

- a. naknade šteta iz člana 47. ovog Zakona,
- b. otkup ugovora o koncesiji iz člana 48. ovog Zakona,
- c. pomoći koncesionaru iz člana 50. ovog Zakona,
- d. provođenje rješenja nadležnih organa donesenih na osnovu ovog Zakona,
- e. sufinansiranje većih infrastrukturnih projekata iz stava (2) tačka f. ovog Zakona.

Član 67.

(Programsko trošenje namjenskih sredstava)

- (1) Nadležni organ za sredstva iz člana 65. stav 1. ovog Zakona dužan je donijeti program namjenskog utroška sredstava koji treba da sadrži aktivnosti i iznose sredstava koje će se financirati a koje su utvrđene u članu 66. stav (2) ovog Zakona.
- (2) Program iz stava (1) ovog člana na prijedlog nadležnog organa usvaja Vlada Kantona odnosno općinsko vijeće.

Član 68.

(Korištenje rezervnih sredstava)

- (1) Rezervna sredstva iz člana 65. stav (1) tačka c. uplaćuju se na poseban podračun Budžeta Kantona.
- (2) Način korištenja sredstava iz stava (1) ovog člana vrši se u skladu sa programom utroška sredstava koji donosi Vlada kantona uz saglasnost Skupštine Kantona.

DIO ČETRNAESTI **NADZOR NAD SPROVOĐENJEM OVOG ZAKONA** **I UGOVORA O KONCESIJI**

Član 69.

(Vršenje nadzora)

- (1) Nadležni organi vrše nadzor nad sprovođenjem ovog Zakona i ugovora o koncesiji.
- (2) Poslove inspekcijskog nadzora iz stava (1) ovog člana vrši Kantonalna uprava za inspekcijske poslove.

Član 70.

(Inspekcijski nadzor)

- (1) Nadležni kantonalni inspektor ima pravo i dužnost da vrši nadzor da li se prirodno bogatstvo ili dobro u općoj upotrebi ili vršenje komunalnih i drugih javnih službi ili korištenje komunalne infrastrukture koristi, odnosno vrši bez koncesije.
- (2) Nadležni kantonalni inspektor ima pravo i dužnost da vrši nadzor i provjeru rada koncesionara, kao i nadzor nad izvršavanjem obaveza koncesionara iz ugovora o koncesiji.

Član 71.

(Prava i obaveze organa nadležnog za inspekcijski nadzor)

- (1) Nadležni kantonalni inspektor ima pravo i dužnost da:

- a. prije i u toku vršenja inspekcijuskog nadzora ulazi u poslovni krug, proizvodne, poslovne i druge objekte pravnih i fizičkih lica, odnosno koncesionara,
- b. vrši inspekcijuski nadzor nad korištenjem prirodnih bogatstava ili dobara u općoj upotrebi ili vršenja komunalnih ili drugih javnih službi ili korištenje komunalne infrastrukture,
- c. vrši kontrolu poslovnih knjiga, zapisnika, izvještaja i drugih spisa od značaja za vršenje inspekcijuskog nadzora,
- d. traži umnožavanje poslovnih knjiga, zapisnika, izvještaja i drugih isprava i njihovu neposrednu predaju, odnosno dostavljanje nadležnom kantonalnom inspektor.

(2) Zabranjeno je pravnom licu i odgovornom licu u pravnom licu i fizičkom licu, odnosno koncesionaru i odgovornom licu koncesionara, da spriječava ili ometa nadležnog kantonalnog inspektora u vršenju nadzora i uviđaja na licu mjesta u smislu stava (1) ovog člana.

Član 72.

(Poduzimanje radnji od strane nadležne inspekcije)

(1) Ako utvrdi da je povrijeđen ovaj Zakon ili ugovor o koncesiji, nadležni kantonalni inspektor će u zapisniku konstatovati nepravilnosti i nedostatke i rješenjem odrediti mjere i rok za njihovo izvršenje.

(2) Pored ovlaštenja i dužnosti određenih posebnim zakonom kantona, u slučaju iz stava 1. ovog člana, nadležan kantonalni inspektor je ovlašten i dužan:

- a. da naredi obustavu radova i drugih aktivnosti usmjerenih na korištenje ili korištenja prirodnih bogatstava, ili dobara u općoj upotrebi, ili vršenje komunalnih ili drugih javnih službi, ili korištenja komunalne infrastrukture, ako se vrše bez koncesije, i odredi rok za podnošenje zahtjeva nadležnom ministarstvu za dodjelu koncesije;
- b. da naredi obustavu korištenja koncesije ako se koncesija vrši protivno uslovima pod kojima je koncesija dodjeljena, i odredi rok u kome se koncesionar mora prilagoditi uslovima pod kojima je koncesija dodjeljena;
- c. da naredi obustavu korištenja koncesije ako ustanovi da je koncesionar samovoljno izvršio promjene na objektima ili postrojenjima koja koristi pri ostvarivanju koncesije ili ne održava te objekte i postrojenja, na zadovoljavajući način, radi čega nastaje opasnost za prirodna bogatstva ili dobra u općoj upotrebi ili može doći do povrede zakonitih prava trećih lica na prirodnim bogatstvima ili dobrima u općoj upotrebi, i odredi rok za uspostavljanje predašnjeg stanja, odnosno dovođenje u zadovoljavajuću tehničko-tehnološku ispravnost objekata i postrojenja koja služe za ostvarivanje koncesije.
- d. da odmah obustavi korištenje prirodnog bogatstva ili dobara u općoj upotrebi ukoliko se isto koristi bez ugovora, u slučaju da se radi o već izgrađenim postrojenjima, objektima, uređajima i opremi, te da naloži korisniku da odmah a najdalje u roku od 30 dana pristupi zaključivanju Ugovora o koncesiji.

(3) Nadležni inspektor je dužan da obustavi svako korištenje predmeta koncesije za koje nisu zaključeni Ugovori o koncesiji.

DIO PETNAESTI
KAZNENE ODREDBE

Član 73.
(Kaznene odredbe)

- (1) Novčanom kaznom u iznosu od 5.000,00 KM do 15.000,00 KM, kaznit će se za prekršaj pravno lice koje koristi prirodno bogatstvo, dobro u općoj upotrebi, bez potpisanog ugovora o koncesiji.
- (2) Novčanom kaznom u iznosu od 1.500,00 KM do 3.000,00 KM kaznit će se za prekršaj odgovorno lice u pravnom licu koncesionara za radnje iz stava (1) ovog člana.
- (3) Novčanom kaznom u iznosu od 500,00 KM do 1.500,00 KM, kaznit će se za prekršaj fizičko lice koje koristi prirodno bogatstvo, dobro u općoj upotrebi bez potpisanog ugovora o koncesiji,
- (4) Pored novčane kazne, lica iz stava (1) i (3) ovog člana je dužno da vrati cijeloukupnu imovinsku korist pribavljenu korištenjem prirodnog bogatstva ili dobra u općoj upotrebi za period korištenja bez zaključenog ugovora o koncesiji.
- (5) Novčanom kaznom u iznosu od 3.000,00 KM do 10.000,00 KM, kaznit će se za prekršaj pravno lice - koncesionar ukoliko koristi predmet koncesije u obimu većem od ugovorenog.
- (6) Novčanom kaznom u iznosu od 1.500,00 KM do 3.000,00 KM kaznit će se za prekršaj odgovorno lice u pravnom licu koncesionara za radnje iz stava (4) ovog člana.
- (7) Novčanom kaznom u iznosu od 500,00 KM do 1.000,00 KM, kaznit će se za prekršaj fizičko lice - koncesionar ukoliko koristi predmet koncesije u obimu većem od ugovorenog
- (8) Novčanom kaznom u iznosu od 2.000,00 KM do 12.000,00 KM, kazniće se za prekršaj pravno lice - koncesionar koji je dao lažne izjave radi osiguranja transfera udjela, dionica ili uvjerenja o dionicama a na osnovu kojih koncesor izdaje ovlaštenje za transfer.
- (9) Novčanom kaznom u iznosu od 500,00 KM do 3.000,00 KM kaznit će se za prekršaj odgovorno lice u pravnom licu - koncesionara za radnje iz stava (7) ovog člana.
- (10) Novčanom kaznom od 1.000,00 KM do 3.000,00 KM kaznit će se za prekršaj lica iz stava (7) i (8) ovog člana ako:
 - a. propuste ili odbiju da popune i vrate nepopunjena dokumenta na način propisan ovim Zakonom;
 - b. propuste ili odbiju da odgovore na pitanja koja se postavljaju u dokumentima;
 - c. namjerno daju pogrešan odgovor;
 - d. propuste da odgovore na pitanja kojima se mogu utvrditi činjenice za koje se vrši upit;
 - e. na zahtjev koncesora odbiju da predoče osobi ovlaštenoj od strane resornog ministra da provjeri knjigu, dokumenata, račune, arhive ili drugu dokumentaciju;
 - f. propuste ili odbiju da obave neku dužnost koja im se povjeri, a za koju nije utvrđena kazna;

- g. propuste ili odbiju da izvrše zahtjev ili nalog koji izda koncesor, ili presudu nadležnog suda.
- (11) U smislu stava (8) ovog člana, radnja, propust ili greška bilo kojeg odgovornog lica, službenika, agenta, ili drugog lica koje djeluje u ime ili je zaposlen kod nekog koncesionara i djeluje u okviru svoga posla i uputa, u svakom slučaju smatra se činom, propustom ili greškom toga koncesionara.

Član 74.

(Potpisivanje ugovora sa postojećim korisnicima)

- (1) Pravno lice koje je nosilac prava za korištenje općeg ili drugog dobra zaključuje ugovor o koncesiji bez provođenja postupka propisanog ovim Zakonom na period od pet (5) godina, ako nosilac prava korištenja ispunjava uslove za dodjelu koncesije propisane ovim Zakonom.
- (2) Korisnik općeg ili drugog dobra iz stava (1) ovog člana dužan je podnijeti zahtjev za potpisivanje ugovora o koncesiji u roku od 90 dana od dana stupanja na snagu ovog Zakona.
- (3) Koncesionari koji su potpisali koncesione ugovore za predmete koncesije koji su u nadležnosti Kantona po važećim propisima na period do 5 (pet) godina, imaju pravo kroz provođenje procedure utvrđene ovim Zakonom za isti predmet koncesije potpisati novi koncesioni ugovor.

DIO ŠESNAESTI **PRELAZNE I ZAVRŠNE ODREDBE**

Član 75.

(Podneseni zahtjevi)

Zahtjevi za dodjelu koncesija podneseni kantonalnim organima do dana stupanja na snagu ovog Zakona riješiće se po ovom Zakonu.

Član 76.

(Prestanak važenja Zakona)

Danom stupanja na snagu ovog Zakona prestaje da važi Zakona o koncesijama („Službene novine Bosansko-podrinjskog kantona Goražde” broj: 5/03)

Član 77.

(Stupanje na snagu Zakona)

Ovaj Zakon stupa na snagu osmog dana od dana objavljivanja u “Službenim novinama Bosansko-podrinjskog kantona Goražde”.

Broj: 01_____13.
Goražde, _____2013.godine

PRESJEDAVAJUĆI SKUPŠTINE

Došlo Suad

OBRAZLOŽENJE

1.USTAVNI OSNOV

Ustavni osnov za donošenje navedenog Zakona sadržan je u odredbama Poglavlja IV odjeljak A člana 23.Ustava Bosansko-podrinjskog kantona Goražde („Službene novine Bosansko-podrinjskog kantona Goražde“ broj:8/98,10/00 i 5/03) kojim je utvrđeno da Skupština Bosansko-podrinjskog kantona Goražde donosi zakone i druge propise u okviru izvršavanja nadležnosti kantona.

2.RAZLOZI ZA DONOŠENJE ZAKONA

Programom rada Skupštine Bosansko-podrinjskog kantona Goražde za 2013. godinu („Službene novine Bosansko-podrinjskog kantona Goražde“ broj:3/13), pod tačkom 36. predviđeno je donošenje Zakona o izmjenama i dopunama Zakona o koncesijama, gdje je rok za donošenje predviđen u II-om tromjesečju i čiji je obrađivač Ministarstvo za privredu BPK Goražde.

U toku primjene važećeg Zakona o koncesijama („Službene novine Bosansko-podrinjskog kantona Goražde“ broj:5/03) uočen je niz nedostataka u istom te pravnih vakuuma koji onemogućavaju dosljedni primjenu istog ili da se dio odredbi ovog Zakona nalazi u direktnoj i indirektnoj koliziji sa drugim zakonim i propisima. Naime, od moment donošenja važećeg Zakona o koncesijama proteklo je više od 10 godine a za taj period nikad nisu izvršene izmjene ili dopune istog u smislu usklađivanja odredbi ovog sa drugim zakonima. Isto tako, zbog harmonizacije propisa donesenih na državnom i federalnom nivou, ukazala se potreba da se ovaj Zakon izmjeni odnosno donese novi. Novi predloženi Zakon predviđa određene novine koje bi poboljšale planski pristup u korištenju prirodnog bogatstva, optimalno korištenje, način organizacije Komisije za koncesije, način raspodjele prihoda od koncesija i koncesionih naknada, uvođenje javnog konkursa za samoinicijativnu ponudu, te postupke i ovlaštenja nadležnih organa u slučaju korištenja prirodnog bogatstva bez zaključenog ugovora o koncesiji. Navedeno je samo dio ključnih činjenica koje su opredjelile ovaj organ kao obrađivača ovog Zakona da se donese novi Zakon tj. da se ne vrše izmjene i dopune postojećeg jer bi iste bile obimne i obuhvatale bi izmjenu od preko 50% osnovnog teksta Zakona.

3.OBRAZLOŽENJE POJEDINIH ODREDBI

Ovaj tekst Zakona obuhvata šesnaest dijelova odnosno poglavlja tako da će se u daljem tekstu obrazloženja prikazati pojedina zakonska rješenja po poglavljima.

DIO PRVI- Obuhvata opće odredbe Zakona koje obuhvataju članove od 1 do 13. , definišući predmet Zakona, definicije pojmova, definisanje koncesije, ciljeve i politike u oblasti koncesije, predmet koncesije, samoinicijativnu ponudu te naknadu za koncesije. U ovom dijelu Zakona, između ostalog, definiše se pojam javno-privatnog partnerstva što je svakako novina u odnosu na važeći Zakon, tako da se u daljem tekstu ovog Zakona pojedine odredbe shodno primjenjuju i na oblast javno-privatnog partnerstva.

DIO DRUGI-Ovaj dio obuhvata odredbe članova 14 do 21, a odnosi se na planiranje i pripremne radnje za dodjelu koncesije. Uvodeći planski pristup za dodjelu koncesija smatramo da će se poboljšati ekonomičnost, rentabilnost i optimalnost korištenja prirodnog bogatstva, dobara u općoj upotrebi i javnih usluga, iz čega proizilazi obaveza da se donose godišnji i srednjoročni odnosno trogodišnji planovi dodjele koncesija. Navedenim odredbama utvrđeno je šta planovi moraju sadržavati, organi koji su dužni donositi i predlagati planove, izrada studija ili elaborata za dodjelu koncesija, procjenu vrijednosti koncesija te dokumentaciju za nadmetanje. Ono što je karakteristično, između ostalog, jeste procjena vrijednosti koncesije, jer smatramo da svi organi koji su po ovom Zakonu nadležni za koncesije, trebaju da utvrde koja je vrijednost imovinskog dobra tj.prirodnog bogatstva koje se daje putem koncesije ili dobra u općoj upotrebi odnosno javne usluge.

DIO TREĆI- Obuhvata odredbe članova od 22 do 39. i isti se odnose na postupak za dodjelu koncesije, raspisivanje i sadržaj javnog konkursa za dodjelu koncesije, kriterije za dodjelu koncesije, način formiranja Komisije za koncesije i njene nadležnosti, sredstva za rad komisije, dostavljanje ponuda i njihovo otvaranje, pregledanje i ocjenjivanje, predlaganje dodjele koncesije i odluku o dodjeli koncesije sa sadržajem iste. Za razliku od važećeg Zakona, ovaj Zakon predviđa imenovanje komisije u kojoj će biti zastupljeni i članovi ispred jedinica lokalne samouprave na čijoj teritoriji se vrši dodjela koncesije, a postupak imenovanja komisije će se vršiti u skladu sa Zakonom o ministarskim, vladinim i drugim imenovanjima u F BiH. To znači da se imenovanje vrši na osnovu javnog poziva te da se imenovanje vrši na period do 4 godine. Ovo zakonsko rješenje nije bilo predviđeno važećim Zakonom što je više puta isticano kao primjedba od strane Ureda za reviziju institucija u F BiH, u smislu da Komisija treba da ima status reguliranog tijela.

DIO ČETVRTI- U ovom dijelu sadržane su odredbe članova od 40 do 42. i isti obuhvataju period na koji se koncesija dodjeljuje, produženje vremena na koji je koncesija dodjeljena i slučajevi u kojima se može produžiti ugovor te bnova ugovora.

DIO PETI- Sadrži odredbe od člana 43. do 45. a iste se odnose na ugovor o koncesiji, sadržaj ugovora i registar ugovora. Ovim odredbama definisani su osnovni elementi ugovora, a predviđeno je i donošenje podzakonskog akta o obrazovanju i vođenju registra koncesija tj,zaključenih koncesionih ugovora kao baze podataka.

DIO ŠESTI-Reguliše izmjene ugovora i otkup koncesije a sadržan je u odredba,a članova 46 do 48, uslovi pod kojima se pristupa izmjeni ugovora, naknadu štete u slučaju izmjene ugovora te otkup ugovor o koncesiji.

DIO SEDMI- Ovaj dio Zakona obuhvata odredbu člana 49.i odnosi se na prijenos koncesije, uslove pod kojima se prenosi te obaveze novog koncesionara.

DIO OSMI- Predviđa se pomoć koncesionaru u slučaju da dođe do finansijskih poteškoća bez svoje krivice, a postoji javni interes da se koncesija i dalje vrši. Ovaj dio obuhvata odredbe članova 50 i 51 ovog Zakona.

DIO DEVETI-Članom 52 i 53 propisane su nadležnosti za rješavanje spora kao i sporova po pitanju nadležnosti za dodjelu koncesija.

DIO DESETI- Ovaj dio obuhvata pravnu sigurnost i zaštitu koncesionara na način predviđen odredbama člana 54 i 55.

DIO JEDANAESTI- Ovaj dio reguliše prestanak koncesije, raskid ugovora, prekid ugovora, pravo na naknadu štete, obustavu korištenja koncesije, te ostale uslove raskida ugovora kao i organe nadležne za poduzimanje pravnih radnji u ovim slučajevima. Ovaj dio obuhvata odredbe od člana 56 do 61. ovog Zakona.

DIO DVANAESTI- Odredbama člana 62 do 64. Propisano je prenošenje vlasništva na nekretninama, postrojenjima i stvarima koje su neposredno služile za ostvarivanje koncesije i prenos vlasništva u slučaju raskida ugovor.

DIO TRINAESTI- Obuhvata odredbe od člana 65 do 68.i odnosi se na raspodjelu i namjensko korištenje prihoda od koncesionih naknada. Vodeći računa o zastupljenosti jedinica lokalne samouprave po pitanju prihoda od koncesije predviđeno je da se prihodi raspodjeljuju u korist kantona 40%, općine 40 % i 20% prihoda u korist rezervnih sredstava. Rezervna sredstva su također novina u ovom Zakonu a ista bi se namjenski koristila za otkup ugovora, naknade šteta, pomoć koncesionaru te sufinansiranje infrastrukturnih projekata.

DIO ČETRINAESTI- Sadrži odredbe od člana 69. do 72.u kojim se definiše nadzor nad sprovođenjem ovog Zakona, organi i tijela nadležna za nadzor, poduzimanje radnji nadležnih organa te prava i obaveze istih. Upravo zbog pravnog vakuuma u važećem Zakonu, ovim Zakonom predviđeno je postupanje u onim slučajevima gdje se korištenje prirodnog bogatstva vrši bez zaključenog ugovora o koncesiji. Ovaj dio obuhvata zabranu daljeg korištenja i obavezu zaključivanja ugovora, te rokove u kojima je korisnik dužan zaključiti ugovor o koncesiji.

DIO PETNAESTI- Obuhvata kaznene odredbe koje su sadržane u članu 73. i potpisivanje ugovora sa postojećim korisnicima.

DIO ŠESNAESTI- Ovaj dio obuhvata prelazne i završne odredbe te odredbu prestanka važenja Zakona o koncesijama („Službene novine BPK Goražde“ broj:5/03.)

4.FINANSIJSKA SREDSTVA POTREBNA ZA PROVOĐENJE OVOG ZAKONA

Kada su u pitanju finansijska sredstva potrebna za provođenje ovog Zakona smatramo da će ista biti na nivou sredstava koja su i do sada bila neophodna za primjenu Zakona o koncesijama, odnosno smatramo da ovaj Zakon neće iziskivati dodatno terećenje budžeta. Takođe, smatramo da će ovaj Zakon imati pozitivne efekte na priliv sredstava u budžete, naravno pod uslovima da se isti dosljedno provodi i primjenjuje od strane svih nadležnih organa koji imaju definisane nadležnosti kod primjene ovog Zakona.